

中國邊疆史志集成

東北史志

第五部

11

全國圖書館文獻縮微複製中心

中國邊疆史志集成

東北史志

第五部
11

全國圖書館文獻
縮微復制中心

自鳳翔繼之三年春自請率大軍度隴紆朝廷西顧憂值藍大順自蜀竄陝陷盩厔穆圖善溫德勒克西攻之不能下多隆阿往視師盩厔城小而堅藍大順善守誘之不出轟以地雷不墮多隆阿曰吾分軍更番進擊月城破彼無所投死糧盡可聚殲也廷議不知其狀依常法督責陝撫劉蓉至漢中陽言遣將助攻多隆阿憤懣作望樓躬視城中中槍傷右目督攻益急二月二十四日盩厔下藍大順由地道出走追至南山禽之多隆阿創甚不能興朝廷聞其被創累賜珍藥並詔其子雙全馳驛赴陝侍疾尋命督辦甘肅陝西兩省軍務時前軍將雷正綰陶茂林兩軍已薄平涼東關矣夏四月十三日創裂卒於盩厔軍中年四十有七賜治喪銀千兩贈太子太保給一等輕車都尉諡忠勇陝民處處祠之雖所未

至皆傷痛謳思焉軍興以來諸大將皆雄於貲多隆阿亮節清風身無珍裘綺羅之奉家無屋子無衣履論者以爲天人也金陵克復追念前助加賞雲騎尉世職併所給一等輕車都尉晉爲一等男以其子雙全襲之

烏勒西布字錦華滿洲托活羅氏隸齊齊哈爾正白旗咸豐三年以甲兵戰豫晉燕齊楚皖金陵揚州間凡七年保驍騎校晉防禦十年都興阿督辦江北軍務才之檄辦滿營務處累保副都統補墨爾根城鑲紅旗公中佐領同治三年從都興阿西征甘肅荒遠轉饟難烏勒西布駐阿拉善旗之磴口鎮總辦糧務購歸綏糧水陸輸之甯靈練蒙衆造礮船以翼衛之性剛明不輕然諾蒙回悅服爭助饋運甯夏一軍餉需絀而不饑潰烏勒西布之力居多云

七年十二月叛回數百騎來襲率衛士八十人禦之衆寡不敵遂被圍回詰問烏大人安在厲聲叱曰某在此鼠輩欲何爲回以長矛環刺之死焉卹蔭騎都尉兼一雲騎尉世職諡武毅詔建專祠於甯夏祀之子阿克敦保襲光緒二十年充黑龍江練軍營官禦日本於海城受重傷賞花翎甯夏平回一役同時從征者敦奇祥阿富勒琿薩斌圖常福惟敦奇祥阿陣亡

穆騰阿字瑞亭郭博勒

貝一作爾 郭

氏黑龍江布特哈達呼爾世居莽

鋪屯諡恪僖都統中山長子以父蔭洊授二等侍衛御前行走道光之季嘗防海浙江咸豐四年林鳳祥犯畿輔從僧格林沁逐之於阜城晉頭等侍衛明年正月從破連鎮擒林鳳祥齎露布入朝加副都統銜仍還軍從下高唐俘李開芳於馮官屯六年冬將察

哈爾騎兵五百助戰河南捻僭崇安朱連泰覆雉河集窮追三日及於臨渙會河橋捻渠張樂行阻河死鬪其黨龔得以大衆犯我師自宵至於翌日午不能解穆騰阿傷臂以功最賞濟特固勒武依巴圖魯七年二月上命接統西凌阿騎軍而以原將察哈爾兵畀安徽軍營穆騰阿拔薩薩布克蒙額烏勒興阿法克吉布楚勒剛阿善慶爲營總皆馳驟善戰爲各軍帥所倚重三月陳玉成竄六安捻渠張樂行龔得入正陽關分攻固始穎上廬鳳之道不通穆騰阿將騎樂善將步力解固始圍營總法克吉布趨穎上捻黨奔三河玉成之黨走正陽穎上圍解遂合大軍攻三河尖旬有五日夜下之閏五月勝保將規正陽穆騰阿先諸軍至奪城南板橋集枸杞園各隘僭樂善克劉帝城斃捻二千正陽下八年春解固始

圍進收六安州營總楚勒剛阿戰死還軍趨懷遠克蒙額敗擒龍
亢薩薩布敗擒總鋪逼鳳陽而軍七月陳玉成李傳賢陷廬州皖
撫翁同書退保定遠穆騰阿赴援遇敵藕塘以連環槍轟擊殪五
百人毀柵壘七既夕下令整隊行衆以戰疲請稍息不聽夜半敵
來襲得空營大驚穆騰阿返旆蹙之遂崩潰鳳陽擒趨紅心驛亦
爲薩薩布所殲捷聞賞頭品頂戴東躡寇天長大捷馬家集斬馘
二千毀壘五拔難民千餘收天長張樂行撲劉府勝保突圍出穆
騰阿還軍救之力戰馬頭集鑪橋上窰間寇散復合九年春皖軍
吉順余成蛟成合肥護城驛陳玉成急攻之勝保自將往救再戰
皆衄亡總兵柏山知府顏懷志十數人惟穆騰阿壁八斗嶺一軍
獨全四月玉成再陷天長屯重兵汴澗穆騰阿偕張德勝進擊平

壘二十斬馘四千五月陷盱眙以大衆來攻設伏高橋敗之六月克盱眙先登定遠被圍使薩薩布馳援破西門堅壘勝保至明光不敢進退屯蔣壩定遠陷皖事益棘參將尹善廷軍被困於鑑橋薩薩布力戰三日拔之出十月進攻懷遠穆騰阿先諸軍至直搗文昌閣毀下洪浮橋斷其糧道遂克之進克臨淮關功最即軍中授鑲藍旗漢軍副都統仍下部優敘十年正月袁甲三代勝保將詔穆騰阿幫辦安徽軍務穆騰阿本豫軍初從英桂勝保轉戰豫皖境其後勝保綰欽符總三省勦匪事例受節制至是專爲皖軍矣二月攻鳳陽敗張樂行援衆於梁家岡城擒張隆以城降遷鑲黃旗蒙古都統閏三月移師定遠張樂行龔得嬰城固守陳德才吳如孝自廬州陳玉成自江甯先後來援其衆十倍八月偕袁甲

三退守臨淮敵撲鳳陽府縣城烏勒興阿克蒙額於南路大捷二城獲全時英兵犯天津袁甲三請勤王穆騰阿先驅道徐州疏請起用宿將伊興額主徐宿軍事款議成還軍明年請疾詔回京供職同治元年遷西安將軍幫辦勝保軍務勝保被逮詔赴西安將軍任主省防時督辦陝西軍務大臣多隆阿軍渭北幫辦雷正綰軍三原顧西路省防茶弱且乏食東路回數來攻偕提督馬德昭力戰卻之明年七月多隆阿劾馬德昭罷之穆騰阿坐前後疏牴牾部議褫職賞副都統銜授巴里坤領隊大臣入覲改署京旗副都統充神機營專操大臣六年管理神機營事遷鑲白旗蒙古都統時巨捻賴文光任柱未平而梟匪起梟匪者燕齊大猾販私鹽爲姦利橫行海濱其剽悍飄忽猶之皖豫捻也直督劉長佑遣軍

擊之無功秋七月命穆騰阿將神機營三千人會勦并命節制總兵劉景芳各軍穆騰阿轉戰涿冀滄德間數月平之明年賞紫禁城騎馬又明年充內大臣十年遷江甯將軍兵燹後旗制僅存空名穆騰阿補缺額備器械勤操練漸復舊觀江甯駐防試春官輒不利穆騰阿建崇文書院延碩師主之廩以重脩庚辰第進士者二人辛巳四人士風蒸蔚自英人款議成朝廷注意江海防穆騰阿疏言爲京師根本計宜練精兵萬人京津間備不虞又疏言盛京吉林黑龍江三省與強俄鄰形勢視海疆重兵部侍郎彭玉麟知兵有威望請畀以練兵籌餉責消患未萌上採其議簡穆圖善爲東三省練兵大臣蓋不欲以漢人疆理關東也光緒六年詔求將才舉吳長慶程文炳歐陽利見富陞安德桂發張德勝郭寶昌

以應是年調鑲黃旗蒙古都統兼管理神機營大臣明年兼管健銳營大臣稽查城外七倉大臣監督崇文門稅務十年卒年七十有一賜祭葬并於江甯建專祠穆騰阿習漢文工書翰視黑水諸將文學最優著有奏議二卷礮陣圖說一卷子五人長希拉綳阿正白旗蒙古副都統右翼前鋒統領次希瀾札布乾清門頭等侍衛三希拉本乾清門二等侍衛鑾儀衛雲麾使四希拉納山西游擊均先卒五希朗阿自有傳

巴揚阿字玉農齊齊哈爾達虎里咸豐二年以協領引見時徵黑龍江兵南征使巴揚阿分將之明年從尙書恩華解懷慶圍追逐入晉折而東趨勝保檄出其前迎擊四年攻河南儀豐鎮創臂詔詢傷痕戰狀從攻獨流擊潰之復逐至富莊驛大破之賞花翎五

年從克東西連鎮馮官屯皆有功西凌阿督師入楚將黑龍江三起騎兵以從收德安加副都統銜補呼蘭城守尉六年從總督官文攻漢陽漢陽克論功晉副都統賞依勒固爾巴圖魯七年統湖北北路軍平襄鄖收伏叛勇咸來歸陳玉成犯楚會師廣濟破走之遷鑲紅旗漢軍副都統署荊州左翼副都統十一年春陳玉成再犯楚巴揚阿率馬步三千人進壁東湖彭玉麟水師亦至省防始固賞頭品頂戴同治元年徙荊州右翼副都統四年晉荊州將軍荊州旗營狃舊陣法不適於行軍巴揚阿即已所得於攻戰者爲變更之復選高才生月再課之廩以膏火自是稍稍知方志學矣九年江漢並溢水齧護城隄幾裂巴揚阿扁舟載牲帛哭禱於神人亦多其能爲民請命也水立退光緒二年十月卒於官賜祭

葬諡威勤子鄂英主事鄂齡吉林府知府以候補道記名副都統
色爾固善字子良滿洲霍羅氏隸齊齊哈爾鑲白旗咸豐三年以
驍騎校禦寇直隸江北五年以參領改隸江南大營收鎮江溧水
句容洊保花翎副都統鎮江紅山凹之役殲楊侍琮賜號維拉台
巴圖魯十年和春師潰色爾固善收黑龍江兵八十七人航海赴
天津僧格林沁治兵天津奏奪其官令隸德楞額韓莊軍充營總
尋擢翼長捻窺宿遷丁廟色爾固善渡順河集逐之燔寇二百人
復原官十一年荷澤之戰因先退再奪官敗鄒縣教匪再復官躡
捻青州臨朐諸城莒州沂水間轉鬪數百里賞頭品頂戴敗汴塘
捻劉平於嶧殲七千人晉都統遙授福州副都統同治元年大捷
豐縣新安莊禽其渠劉兆燦趙鳳堂進毀劉平澗頭集老巢先是

劉雙印詣色爾固善降已而叛去又岨於魚臺三奪官二年從僧格林沁克溜川匪渠劉德培走大白山色爾固善將騎兵傅振邦將步兵躡之俘以獻餘黨六百人無一脫者三復原官改甯古塔副都統河南巡撫徵黑龍江西丹備戰奏調色爾固善司訓練三年與張曜合軍敗捻於南陽光山浙川又南入楚敗之鄖陽俄東趨匯麻城偕善慶軍麻城東北門大戰五旬敵棄城走躡而北敗張總愚陳大喜之衆於新店逐北三十里四年夏僧格林沁戰歿曹南騎將高福等俱奪職上以色爾固善治軍謹嚴有謀勇交欽差大臣曾國藩調遣國藩使爲騎兵統領統高福托倫布兩軍遇捻於蕭色爾固善令高福托倫布張兩翼以進而自率訥穆錦衝其中堅捻大潰追殲之胡家莊奉天馬賊熾尙書文祥請調僧格

林沁舊部助勦曾國藩遣色爾固善赴之五年四月轉盛京副都統奉天大孤山濱海要塞也其東爲龍王廟爲大東溝皆匪巢奸民徐中禮王作福翟永亮窟穴其間爭雄長中禮陽乞降色爾固善納之令導官軍逐捕作福永亮等旣飭中禮繳械散衆不從遂併誅之長山各島皆平光緒初遷察哈爾都統六年卒於官賜祭葬諡威勤子二長富爾遜布副都統銜布特哈總管次富林布二品廕生乾清門頭等侍衛署甯古塔副都統

常星阿巴爾虎胡佳氏隸齊齊哈爾鑲藍旗咸豐三年以披甲徵六年從入楚屬多隆阿破寇新州攻九江楓樹坳負創力戰毀其壘復太湖大戰挂車河洧保花翎協領補呼蘭鑲藍旗佐領拔充營總十一年戰新安渡功最賜號莫德勒巴圖魯陳玉成黃文金

合援安慶五戰皆破之記名副都統同治元年隨克廬州以副都
統記名遇缺題奏多隆阿督辦陝西軍務次商南捻渠姜台凌道
內鄉窺陝常星阿繞出其背草山大呼擊之殲萬人又從破襄河
北堅壘補正黃旗蒙古副都統二年拔陝北羌白鎮王閣村回巢
加都統銜渡涇而南回背水爲陣常星阿自上游先濟各營繼之
回驚潰退至長駝灣焚其巢三年從克盩厔多隆阿卒於軍詔屬
僧格林沁大捷麻城乘勝破黃安料棚擢充翼長蘇倫保溫德勒
克西皆隸之蕭河清戰死廣濟常星阿突圍出詔奪職奪勇號尋
大捷黃陂白沙鋪次年會攻寶豐甘露臺總兵郭寶昌何建鼇壘
未就敵猛撲之常星阿佯退以誘敵恒齡蘇倫保合軍橫擊殲數
千人詔復原官勇號四年正月搏敵寶山恒齡蘇倫保戰死常星

阿將中軍獨完敵東北趨尉氏折而南撲信陽復北走睢州深入山東境官軍尾追匝月往返三千餘里四月遂擒於曹南僧格林沁敗死常星阿潰圍出再奪職奪勇號官文疏言常星阿材武廢棄可惜詔効力西安將軍庫克吉泰軍充陝西行營翼長左宗棠以其宿將也屬整理西征馬隊以保固河防功復原官勇號收鄜州還都統銜十一年署山海關副都統明年實授又明年內召光緒二年改正黃旗漢軍副都統九年調甯夏副都統甘肅通志十四年署將軍明年卒賜治喪銀千兩卹廕如例

溫德勒克西巴爾虎李佳氏隸齊齊哈爾鑲紅旗咸豐二年以甲兵徵逐寇直魯豫境六年從都興阿入楚擊石達開武昌走之七年屠小池口壘轉戰楚皖之交浣保花翎協領多隆阿代都興阿